

AIASHEU

Shimun Grégoire

Nekatshieu utishkuema, nishinua utishkuema. Ek^u nenua peik^u eshkuessiuniti nenua minuateu. Ek^u utushima iapit tanipani, nekatshieu nenua utushima ne ishkuieu. Namaienua tanite uin utauassima, unapema nenua ukussinua.

Ekue itutet anite minashkuat ne ishkuieu ekue pineua nipaiat, ek^u upuamit nutim ekue kashkassipitikut nenua pineua. Uin nenu tutatishu muk^u nenua ui atamenimeu nenua utushima. Apu minuatat nenua. Tapue tekushinit.

— Umenu ma eshpishit, iteu tekushinuat.

Uatamuat nenua unapema.

— Nutim nikashkassipitik^u, iteu.

Uin nenu tutatishu, pineua nenua ushcashinua apatshimeu anite upuamit.

Ekue mushaueunat nenua ukussa tsheshuaikut. Ekue nakatauat nenua ukussa nete minishtikut. Ekue tshitshipanit. Tanite ma anite ishpanitshenat anite ? Mishta-katak^u anite ituteuat, ishpanuat.

Ek^u ne nienekatenitishit ne kukuminash nanitam at ua pitutsheshiti, nenua puateu ukussa : « Nika ! » nanitam eukuan etat, tanite nanitam tshissitutueu. Ek^u manitusha natakamauniku nahi ka mushaueunakanit shashish. Uteshkan-manitusha eukuannua niatakamaunikut nete minishtikut. At kanapua minekashish, ishpish ma tshitimatshe-nimikut... Tanite kuetu itu, ma tetipeueu mani minishtikunu tanite

apu mishanakanit nenu. Ek^u « ka-ninataukua nimushum », ishinam^u. Apu anite nashipetimit. Tshekuennua tapue pet shessipanniti ?

— Pushi nussimish, tshika natakaunitin, itiku. Apu tshi minekash nukushian, tshessinat tshika nutshikakaunan. Muk^u minaush tshika tshi natakaunitin.

Ek^u pushitituat uteshkannit.

— Shuk mitshimini, itiku, shuk tshika utamuauat niteshkanat.

Ek^u tapue nutshikuakanit anite ut ishpimit. Ek^u apu tshi patshitinat kie ussima. Ekue tshessenitak pessish...

— Ekute ek^u, ekute tshe ut kutapepaniuiian nussimish, iteu.

Nenu ma kuetapepaniut nete ekue pakuat nete patshishinit ne auass. Anite tshe itutet, ekue tshitutet.

Ek^u nemenua ukauia nekani, tshissenimeu nienekatshiakanniti ukauia. Katak^u nete tanua tanite. Shashish tanite nete ka mushaueunakanit. Ek^u nahi kukuminash anite, tan tshipa tshi eka natuapameu. « Nika natuapamau nikau », itenimeu mishu etenimat, tshessenimat nienekatshiakanniti ukauia. Kie tan tshipa tshi itenimiku : « Mushaueuneu minishtikut nana ». Ek^u at ua pitutshet anite ne kukuminash, ek^u ishkutenu anite ekue itinamuat tshimannu, ekue ishkuashuat nenua. Apu tshi pitutshet ne ek^u. Ekute anite nepat. Ek^u tshitshue papessish kanapua tanua, eukuannu tshe utitikut uapinniti ukussa. « Tanite neka ? » Nanitam puateu ukussa. Ek^u ne eshinak nana, apu apatenitak ek^u. Tanite mitshetuau ishinam^u :

« Nika, nitakushin ». — « Uesha ek^u nasht ka-takushinitaka nikuss », itenitam^u. Ek^u netuapamat auennua. Umenua ukussa tapue ! Ek^u meshta-minuenitak.

— Tan minaush tshuapimin nikuss, iteu. Nimishta-nekatshik^u tshitshue tshutau, iteu.

Apu tshitut. Ekue tepueshit :

— Aie, iteu nenua unapema, takushinu tshikussin ! Shena, pitukai mak au !

— Tanite tshipa ut tshi takushinu tshikuss ? Minishtikut nana ka nakatauk, itiku.

Ek^u nenua shienamuat. « Uesha nasht ka-aimietaka auennua... », itenimeu ne napeu. Ekue nuteiashkuaik. Auennua nenua napauniti, nenua ka nakatauat minishtikut ukussa ! Anite nipau, ek^u tiepuet :

— Aiashess, ashtam ute, pitutshe ! iteu.

Ekue pet umishtikuaia ekue shatuetshipaniat. Shash tshissenimeu tshe nipaikut, nete tshe tatakusseniti, tshe aitiniti. Nishinishapani utishkuema, anite ekue anashit nisht tshe takushinniti ukussa. Ekue uepishkuaniti nenua umishtikuaia patutsheniti ukussa. Nenua ukauia muk^u umishtikuanua muk^u tiakushkatamat.

— Tshekuannu tshe ashamak ? iteu. Pitukatak^u nipimim !

Upimimishapan, tan tshipa tshi eka pitukatau. Ekue pikuaik. Teueikana iapit nekamut, nikamu. Pitama nishtam, uinishtam nikamu e tshishenniut. Apu nikamuniti ek^u ekutamuat ukussa. Apishish nikamunua ek^u uenuiniti. Anite pimutakuenua pitama ishpimit ekue pitutsheniti kau. Eukuannu ma nekamut. « Tshima passitet assi », ishitanua, tanite tshikaueu tshitshue ne nekamut.

— Nikushe, iteu, namaieu ka ishitain. « Tshima eka passitet assi », ka ishitain mani.

— Mauat nuta, itiku, eukuan au ka ishitaian.

Eukuannu nenu katshi nikamuniti ekue unuiniti. Eukuannu pemutakueniti anite ishpimit kie anite nipit. Eukuannu peshkasheiashtannit, ishkuatenu. Ekue ishkuatet pessish nasht nutim, nasht uauanenitamiku kie upimim. Kassinu shash ishkuashu.

— Nikushe, iteu, tanite tshe itishimuian ?

— Nuta, itiku, tshipimimit anite itishimuk^u, ekute anite tshe taiek^u.

Tshititaussutshik^u !

Tan tshipa eka ishkuatepannu upimim.

Ek^u nenu katshi aitit, ukauia ek^u tshe ueueshiat.

— Usham tshitshitimatshenimititi, iteu. Tshika piminashin tshin, nika, « pipitsheu » tshika ishinikashun. Ekute tshe tshiueian kie nin.

Eukuannua ukauia pipitsheua. Eukuannu uepaut tapue. Ukauia uapameu uepauniti, mishkut ekue mishta-minuenitak katshi mishta-nekatshiuniti nanitam.

— Kie mamishkut kanapua tshika ishpan pepuki. Napiki ne, kie nete tshe ishpanin, napiki tshe tshiepanin, iteu, ukauia nenua.

Ekuan pitama.